



Aaja Chemnitz Larsen,
Inatsisartunut ilaasortaq

**Akilersilluni peqquserluttuliortoqannginnissaanut iliuusissatut pilersaarut
pillugu § 37 naapertorlugu apeqqut nr. 2017-061-imut akissut**

Brevnr: 01-03-2018
Sagsnr. 2018 - 4666

Inatsisartut suleriaasianni § 37 naapertorlugu akilersilluni
peqquserluttuliortoqannginnissaa anguniarlugu suliniutaasut pillugit Naalakkersuisunut
apeqquteqarputit. Apeqqut uanga suliassaqarfinit akineqartussanngorlugu
innersuunneqarpoq.

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

**1. Ileqqorluttuliorarneq akiorniarlugu Naalakkersuisut sunik
suliniuteqarpat?**

Akissut:

Inuiaqatigiit annikitsuinnarmik akilersilluni peqquserluttuliorfiusartunut
sanilliullugit inuiaqatigiit siammarsimasumik akilersilluni
peqquserluttuliorfiusartut ataatsimut isigalugu ingerlanerlunnerusarput.
Taamaammatt akilersilluni peqquserluttuliorarneq nunatsinni
siammarterneqannginnissaa anguniarlugu Naalakkersuisut suliniuteqarneri
pissusissamisoorpoq.

Qujanartumillu Transparency International Greenland-ip misissuinernik
ingerlataasa paasinarsisippaat nunatsinni akilersilluni
peqquserluttuliorfiusinnaanera navianartorsiorfiusinnaanera annertunngitsoq.

Sanaartornermik suliffeqarfinnut atatillugu akilersilluni peqquserluttuliorfittut
annertuutut eqqaasannut atatillugu taama isiginninneq Naalakkersuisunit
isumaqatigineqanngilaq, tassa suliassaqarfimmi pineqartumi suliassap kimit
isumagineqarnissaanik suliassaqarfimmi ingerlatsisunit siumoortumik
akunnerminni isumaqatigiissuteqartarneri. eqeersimaartumik akiorniarlugit
neqerooruteqartarnermut inatsisit kiisalu unammilleqatigiinnermi oqartussat
pillugit inatsit aqutugalugit suliassaqarfimmi malittarisassiuunneqarnikummata.

Naalakkersuisut nammineq suliassaqarfimminnut atatillugu Naalakkersuisut
qitiusumik allaffeqarfianni suliffeqarfinnilu ataaniittuni sulisunut akilersilluni
peqquserluttuliortoqannginnissaanut politikki oktobarimi 2016-imi
aalajangersaaffigaat. Peqquserluttuliorarneqummut atatillugu Naalakkersuisut
isumaanni qititinneqarpoq peqquserluttuliorarneqummut
akuersaanngilluinnarnissaq tamatumani makku oqariatuutiginerisigut:

- Inuttut soqutigisatta aamma Naalakkersuisut soqutigisaanni
soqutigisatigut akerleriffeqarsinnaanerit pinngitsoortikkusuppavut.
- Akiliilluni peqquserlutsitsinerit sulluunniit akuersaanngilagut.
- Namminerisamik siunertat atorlugit pisortani atorfeqarnerput
atornerlunneratigut imaluunniit pissaanermik imaluunniit qunusaarinerit
atornerisigut inunnik, ingerlatseqatigiiffinit imaluunniit suleqatigiiffinnik
sunniianiingilagut.

- Oqartussatut suliarinninnitsinni sunniisunik imaluunniit sunniiniarnertut isigineqarsinnaasunik, toqqaannartumik toqqaannangitsumilluunniit, tunissutinik imaluunniit allanik iluaqutissanik tigusissanngilagut.
- Sulianik suliarinninnermut, atorfinitsinnermut, pisinnermut, ikiinnermut, kiffartuussinnermut allanulluunniit atasunik uatsinnut atatillugu innunik salliutitsissanngilagut.
- Peqquserlunnerit imaluunniit peqquserlunniarnerit suulluunniit nalunaarutigissavavut.

Whistleblowerimik aqqissuussineq pilersinneqarpoq, taanna aqqutigalugu Namminersorlutik Oqartussani sulisut kikkulluunniit atorfeqarnerminnut atatillugu inatsisitigut ajoqutaasunik qisuariarfigineqarnissaq aarleqqutigiginagu annertuumik kukkussutinik, pissusissaanngitsunik aammalu sulianik ingerlatsinnermi sumiginnaanernik, suliffiup iluani najoqqutarisassanik annertuumik unioqqutitsinnermik aammalu inatsisunik annertuumik unioqqutitsisoqarneranik tunngavissalimmik pasitsaassinernik nalunaaruteqarnissamut periarfissaqarnissaat qulakkeerneqarpoq. Taamaalilluni sulisoq kinaluunniit peqquserluttuliornernik taaneqarsinnaasut iluini pisunik ilisimasaqaleruni pasitsaassaqaruniluunniit whistleblowerimik aqqissuussinnermik atuinissamik periarfissaqartinneqarpoq.

Naalakkersuisut akilersilluni peqquserluttuliortoqannginnissaanut politikkiata nalinginnaasup suliarineqarnera sioqqullugu Aatsitassaqarnermut Naalakkersuisoqarfiup suliffeqarfiullu taassuma ataaniittuni peqquserluttuliortoqannginnissamut politikkiata immikkut ittoq marts-imi 2015-imi aalajangersarneqarpoq. Taaneqartoq ataatsimut isigalugu imarisai akilersilluni peqquserluttuliortoqannginnissaanik aalajangersakkat kingusinnerusukkat saqqummiunneqartut nalinginnaasut assinganik imaqarpoq, taamaattorli ilassuteqartinneqarlutik ilaatigut oqartussanut tunissutit tiguneqartut allatigullu tunissutit, kattuffeqarfinnik ingerlatseqatigiiffinnik suleqateqarnerit pillugit paasissutissanik piimasaqaatinik ilaneqarlutik, tamatumanilu akilersilluni ileqqorluttuliortarnernut pissutsit qanoq isikkoqarneri pillugit ukiumoortumik nalunaarusiortarnissanik piimasaqaatit.

Namminersorlutik Oqartussani suliffeqarfiup iluani malittarisassat siuliani taaneqartut saniatigut suliamut attuumassuteqarneq pillugu pisortani sulianik ingerlatsinnermut inatsimmi aalajangersakkat aqqutigalugit apeqqtut tamanna aamma maleruagassiorneqarpoq. Pisortani sulianik ingerlatsinnermut inatsit kommunini oqartussatut ingerlatsinnermut aamma atuuppoq.

Pisortani sulisunit akilersilluni peqquserluttuliortoqarpat taamatuttaaq pinnerluttulerinnermi inatsit nalinginnaasoq malillugu pillarneqaataassutaasinnaavoq – kiisalu pisortani sulisut akilerlugit peqquserluttuliornissaannik neqerooruteqartunut pillarneqaataassutaasinnaavoq.

Naalakkersuisut akilersilluni peqquserluttuliortoqannginnissaanut nalinginnaasumik politikkiat uani takuneqarsinnaavoq:

http://naalakkersuisut.gl/~media/Nanoq/Files/Attached%20Files/Diverse/Anti-korruptionspolitik_kal.pdf
http://naalakkersuisut.gl/~media/Nanoq/Files/Attached%20Files/Diverse/Anti-korruptionspolitik_dk.pdf

Aatsitassanut Ikummatissanullu Naalakkersuisoqarfiup suliffeqarfiullu taassuma ataaniittuni peqquserluttuliortoqannginnissamut immikkut politikkaa uani takuneqarsinnaavoq:

<http://naalakkersuisut.gl/~media/Nanoq/Files/Publications/Raastof/GL/Anti-korruptionspolitik%20KAL.pdf>

<http://naalakkersuisut.gl/~media/Nanoq/Files/Publications/Raastof/DK/Anti-korruptionspolitik%20DK.pdf>

- 2. Suliffeqarfiit ileqqorluttuliortarnermut immikkut aarlerinartorsiortutut, soorlu aalisarnermi, sanaatornermi aatsitassarsionermilu suliffeqarfiit akimorlugit ileqqorluttuliortarnermik akiuiniarnermut Naalakkersuisut ataatsimoorussamik periuseqarlutilluunniit iliuusissatut pilersaaruteqarpat?**

Akissut:

Immikkoortoq 1 siulianiittoq innersuussutigineqarpoq.

- 3. Ileqqorluttuliortarneq akiorniarlugu naalakkersuisoqarfiit suliffeqarfillu akimorlugit iliuusit tamaasa ataatsimut katersornissaanni suut iluaqutissartaappat?**

Akissut:

Akilersilluni peqquserluttuliortoqannginnissaa pillugu immikkut ittumik qitiusumilluunniit immikkoortortaqaqarfirmik arlaannaannulluunniit attuumassuteqanngitsumik pilersitsisoqarnissaata pisariaqartinneqarsinnaanera Naalakkersuisunit aalajangiiffigineqaranilu isummorsorfigineqanngilaq. Isumassarsiarli Naalakkersuisunit tunngaviusumik soqutiginarlutut isigineqarpoq nalilersuiffigineqarumaarporlu. Akilersilluni peqquserluttoqannginnissaa pillugu immikkoortortaqaqarfeqartoqarnissaanik isumaliuutersuutini inatsisitigut toqqammavissaqartoqarnersoq ilanngullugit nalilersuivigineqartariaqassaaq, aammalu inatsisitigut toqqammavissiisoqarsinnaassanersoq ilanngullugu nalilersuivigineqartariaqassaaq. Taamatuttaarlu ilisimasassanut sulisoqarnikkullu tunngassuteqarsinnaasut ilanngullugit isummorsorfigineqarlutillu ersarissarneqarnissaat ingerlanneqartariaqassaaq.

- 4. Naalakkersuisut ileqqorluttuliortarnermut akiuiniarlutik suliniutiminnik kommuninik oqaloqatigiissuteqarpat, pineqartumilu ataqatigiissaarineruneq suliniuteqarnermik patajaallisaassava?**

Akissut:

Kommunit, tassungalu ilanngullugu kommunit pisortat sulianik ingerlatsineranni inatsimmik malinninersut Naalakkersuisunit nakkutigineqarput. Tamatumunnga atatillugu annertunerusumik ataqatigiissaarinissaq pisariaqartinneqanngitsoq Naalakkersuisut isumaqarput.

5. Ilegqorluttuliortarnermut akiuiniarluni periusissiamik suliaqassagunik, Naalackersuisut ileqqorluttuliortarnermut akiuiniarluni periusissiami suut immikkut aallutissavaat?

Akissut:

Immikkoortoq 1 siulianiittoq innersuussutigineqarpoq.

Inussiarnersumik inuulluaqqusillunga


Aqqaluaq B. Egede



15. februar 2018

Inatsisartut suleriaasianni § 37, imm. 1 naapertorlugu apeqqutit uku Naalakkersuisunut apeqqutigaa:

Naalakkersuisunut apeqqutit:

- 1. Ileqqorluttuliortarneq akiorniarlugu Naalakkersuisut sunik suliniuteqarpat?**
- 2. Suliffeqarfiit ileqqorluttuliortarnermut immikkut aarlerinartorsiortutut, soorlu aalisarnermi, sanaatornermi aatsitassarsiornermilu suliffeqarfiit akimorlugit ileqqorluttuliortarnermik akiuiniarnermut Naalakkersuisut ataatsimoorussamik periuseqarlutilluunniit iliuusissatut pilersaaruteqarpat?**
- 3. Ileqqorluttuliortarneq akiorniarlugu naalakkersuisoqarfiit suliffeqarfiillu akimorlugit iliuusit tamaasa ataatsimut katersornissaanni suut iluaqutissartaappat?**
- 4. Naalakkersuisut ileqqorluttuliortarnermut akiuiniarlutik suliniutiminnik kommuninik oqaloqatigiissuteqarpat, pineqartumilu ataqatigiissaarineruneq suliniuteqarnermik patajaallisaassava?**
- 5. Ileqqorluttuliortarnermut akiuiniarluni periusissiamik suliaqassagunik, Naalakkersuisut ileqqorluttuliortarnermut akiuiniarluni periusissiami suut immikkut aallutissavaat?**

(Inatsisartuni ilaasortaq Aaja Chemnitz Larsen, Inuit Ataqatigiit)

Tungavilersuut:

Ileqqorluttuliortarnerup akiorneqarnissaa salliutinneqassasoq Inuit Ataqatigiit isumaqarput. Ileqqorluttuliortarneq pissaanermik imminut iluaqutserniarluni atonerluinertut taaneqarsinnaavoq. Nunat arlallit ileqqorluttuliortarneq akiorniarlugu periusissiamik suliniuteqarput, taakkulu iloqqorluttuliortarnerup akiornissaanut politikikkut suliniutinik tamakkiisumik ersersitsisuupput. Suliffeqarfiit ilaat aningaasatigut soqutigisat amerlasuut pinerat pissutaalluni, ileqqorluttuliornissamut immikkut navianaateqarnerupput. Taakku assersuutigalugu tassaasinnaapput aalisarnermik, sanaatornermik aatsitassarsiornermillu suliffeqarfiit. Suliffeqarfiit taaneqartut kingullit marluk immikkut annertuumik aallutarineqarput, aalisarnermillu inuussutissarsiornermi ileqqorluttuliortarnermik akiuiniarluni taasarialinnik suliniuteqartoqanngilaq.

Naalakkersuisoqarfiit, kommunit suliffeqarfiillu akimorlugit ileqqorluttuliortarnermik akiuiniarluni periusissiami, ileqqorluttuliortarnermik akiuiniarluni suliat ataqatigiissarlugillu annertusarnissaat annertuumik iluaqutissartaqarsinnaavoq. Ataatsimoorussamik ileqqorluttuliortarnermik akiuiniarluni iliuuseqarneq Kalaallit Nunaata tusaamaneqarneranik tutsuigineqarneranillu annertusaaqataasinnaavoq. Tamanna inuiaqatigiinni siuarsaaniarluni nunanit allanit aningaasaliisartut akornanni periarfissarsiornermi pingaaruteqarsinnaavoq. Taamaaliornissamili Naalakkersuit matuminnga pingaartitsinissaat pisariaqarpoq.

Apeqqutima ulluit qulit ingerlaneranni akineqarnissaat qinnutigaara.